



Segun Joao Suarez di Mota Engil

Proyectonan Watty Vos ta canando segun schedule



ORANJESTAD (AAN): DOW a convoca un conferencia di prensa diarazon mainta y durante di esaki e contratista Mota Engil a duna un update riba varios proyecto cu ta andando. E proyectonan ta Watty Vos - 01, cual ta di e rotonde di FCCA pa e rotonde Cumana, rotonde Seroe Patrishi, e viaducto di Meiveld, rotonde Ling & Sons y Hato. Joao Suarez, general manager di e Watty Vos Project a duna di conoce cu na prome lugar nan kier pidi disculpa pa e inconvenientenan. Ta purbando di haya e mihor balans posibel. Pa loke ta e agenda, el a indica cu Watty Vos 1 ta wordo re-inicia awe dia-

huebs pa dos of tres siman, unda lo keda cla cu entre otro e luznan y e landscape. E rotonde di Seroe Patrishi ainda ta trahando den esey. A confronta algun diferencia y ainda no por a cuminsa cu e rotonde como tal pa motibo cu e companianan di utilidad ta trahando cu e instalacion di wayanan y pipelines. No tin un fecha specifico pa keda cla pero ta trahando riba dje pa keda cla mas lihe posibel, a duna di conoce. Pa loke ta Meiveld, a keda cla cu e prome fase y tur cos ta canando segun schedule. E rotonde Watty Vos - 07 a haya algun problema na cuminzamento pero a logra resolve esey y e trabaonan



ta progresando. Segun Suarez, na Hato e trabaonan ta tumando lugar. Ta spera cu pa fin di Januari di por confirma ki dia e trabaonan lo finaliza. Cayanan lo wordo cerca solamente si ta estrictamente necesario, a bisa. Segun e representante di DOW, unda mas inconveniente tabata tin ta na Seroe Patrishi y na Meiveld pasobra tur cos ta desviacion uno di otro. Pesey a dicidi di diadomingo ultimo pa asfalta Modanza, cual ta facilita e fluho di trafico den e area y pa e area aki. Comunidad mester ta mas conciente y core poco poco unda tin hopi trafico y wak borchin. E borchinan a wordo

aproba door di Cuerpo di Polis prome cu DOW pone nan, a remarca. Finalmente, e representante di Mota Engil a duna di conoce cu

nan ta segun schedule cu e proyecto y nan ta spera di logra tur e otro deadlines den nan contract.